



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2011. GODINU EKOLOŠKE STRANKE E5-ZELENI

Broj: 03-07-6-391/12
Sarajevo, 29. novembar 2012. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1. NALAZI.....	5
5.2. PREPORUKE	8

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Ekološke stranke E5-Zeleni za 2011. godinu.

Rukovodstvo stranke je odgovorno za finansijske izvještaje, postupanje stranke u skladu sa Zakonom o finansiranju političkih stranaka i uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

- 1. Ekološka stranka E5-Zeleni prekršila je odredbe člana 8. stav (1) i člana 11. stav (1) i stav (3) Zakona o finansiranju političkih stranaka.**

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Ekološke stranke E5-Zeleni za 2011. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Ekološka stranka E5-Zeleni je iskazala ukupne prihode u iznosu od 9.257,39 KM, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk. prih. %
1	Članarina	0,00	0,00%
2	Prilozi fizičkih lica	2.180,00	23,55%
3	Prilozi pravnih lica	0,00	0,00%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	0,00	0,00%
7	Prihodi iz budžeta	7.077,39	76,45%
	Ostali prihodi	0,00	0,00%
	Ukupni prihodi:	9.257,39	100,00%

U godišnjem finansijskom izvještaju stranka je iskazala ukupne rashode u iznosu 11.129,77 KM.

2. PREDSTAVLJANJE POLITIČKE STRANKE

Naziv političke stranke: Ekološka stranka E5-Zeleni. Skraćeni naziv: E5.

Evropska ekološka stranka E-5 upisana je u registar političkih organizacija kod Kantonalnog suda u Sarajevu rješenjem broj: R-I-3/04 od dana 15.04.2004. godine. Dana 18.04.2012. godine u registar Općinskog suda u Sarajevu upisana je promjena naziva stranke, koja glasi: "Ekološka stranka E5-Zeleni".

Sjedište političke stranke je u Sarajevu, ulica Titova 9a.

Ovlašteno lice za zastupanje stranke u 2011. godini je Nemin Vila, predsjednik.¹

Lice ovlašteno za podnošenje finansijskih izvještaja za 2011. godinu je Mirela Hamidović.

Prema podacima iz godišnjeg finansijskog izvještaja za 2011. godinu, Ekološka stranka E5-Zeleni ima sljedeću organizacionu strukturu:

- Centrala stranke i
- 16 općinskih odbora.

¹ Dana 18.04.2012. godine u registar Općinskog suda u Sarajevu upisana je promjena lica ovlaštenih za zastupanje Ekološke stranke E5-Zeleni, i to: lice za predstavljanje i zastupanje Ekološke stranke E5-Zeleni je Mesić Zaharije, predsjednik stranke.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Ekološke stranke E5-Zeleni za 2011. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Ekološke stranke E5-Zeleni obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

4. PRETHODNE KONTROLE I REVIZIJE

Služba za reviziju izvršila je reviziju i pregled godišnjih finansijskih izvještaja Evropske ekološke stranke E-5 za period 2005.-2010. godina, nakon kojih su izdati izvještaji o reviziji, odnosno izvještaji o pregledu.

Nakon što je izvršen pregled finansijskog izvještaja za 2010. godinu, Služba za reviziju je izdala Izvještaj o pregledu sa mišljenjem revizora, nalazima i preporukama da stranka treba postupati u skladu sa odredbama člana 8. stav (1) i člana 11 stav (1) Zakona o finansiranju političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2011. godinu, utvrđeno je da politička stranka nije ispoštovala preporuke koje su date u Izvještaju o pregledu godišnjeg finansijskog izvještaja za 2010. godinu, odnosno postupila je suprotno odredbama člana 8. stav (1) i člana 11. stav (1) Zakona o finansiranju političkih stranaka.

5. NALAZI I PREPORUKE

5.1. NALAZI

a) Pregledom godišnjeg finansijskog izvještaja političke stranke, utvrđeno je da je Ekološka stranka E5-Zeleni prekršila odredbu člana 8. stav (1) Zakona o finansiranju političkih stranaka.

Općinski odbor E5 Bosanska Krupa je na osnovu Odluke Općinskog vijeća, broj: 01/V-02-3476-11-1/09 od 17.11.2009. godine, bez naknade, koristio poslovni prostor u vlasništvu Općine Bosanska Krupa².

Korištenjem prostorija u vlasništvu opštine bez naknade, stranka je prekršila odredbe člana 8. stav (1) Zakona o finansiranju političkih stranaka³.

² Dopis Općine Ilijaš broj: 04/1-14-882/12 od 11.04.2012. godine.

³ Državni, entitetski i kantonalni organi, organi Brčko Distrikta BiH, organi opštinskih i mjesnih zajednica, javne institucije, javna preduzeća, humanitarne organizacije, anonimni donatori, vjerske zajednice, kao i pravna lica u kojima uloženi javni kapital iznosi najmanje 25% ne mogu da finansiraju političke stranke.

b) Stranka nije ispoštovala odredbe člana 11. stav (1) i stav (3) Zakona o finansiranju političkih stranaka.⁴

Ekološka stranka E5-Zeleni nije uspostavila potpune evidencije o svojim prihodima i rashodima, i nije popunila godišnji finansijski izvještaj u skladu sa Pravilnikom o godišnjim finansijskim izvještajima političkih stranaka, čime je prekršila odredbe člana 11. stav (1) i stav (3) Zakona o finansiranju političkih stranaka.

(1) Pregledom dodatne dokumentacije, utvrđeno je da stranka nije uspostavila adekvatne evidencije o svojim rashodima, odnosno nije troškove knjižila u momentu nastanka obaveze.

- Uvidom u analitičke kartice, utvrđeno je da je stranka troškove goriva iskazala kao troškove za rad općinskih odbora u iznosu od 1.500,00 KM.

Pregledom je utvrđeno da su sredstva u iznosu od 1.500,00 KM isplaćena za rad OO Bužim, odnosno isplaćena su predsjedniku ovog odbora.

Na osnovu poslovne dokumentacije stranke i kopije računa za gorivo, Služba za reviziju nije mogla utvrditi da su troškovi nastali kao rezultat aktivnosti političke stranke jer stranka nije izdavala naloge za službena putovanja i ne posjeduje bilo koju drugu dokumentaciju na osnovu koje bi bilo moguće utvrditi mjesto i svrhu putovanja.

Služba za reviziju je, takođe, utvrdila da Ekološka stranka E5-Zeleni ne posjeduje vozila u svom vlasništvu, niti ima zaposlene osobe.

Imajući u vidu da stranka ne posjeduje vozila, odnosno da nema zaposlene, a da je vršila isplate fizičkim licima, koje sa poreskog aspekta imaju karakter ličnih primanja, stranka je bila obavezna izvršiti obračun poreza na dohodak i pripadajuće doprinose na iznos od 1.500,00 KM.

Obzirom da Ekološka stranka E5-Zeleni nije obračunala i platila porez na dohodak i pripadajuće doprinose na isplaćena sredstva, troškovi i obaveze po ovom osnovu nisu iskazani ni u poslovnim knjigama ni u finansijskom izvještaju.

- Ekološka stranka E5-Zeleni je troškove ptt usluga knjižila u zbirnom iznosu, odnosno u momentu kada su obaveze prema dobavljačima plaćene, što nije u skladu sa propisima i računovodstvenom praksom. Pregledom je utvrđeno da je stranka u poslovnim knjigama za 2011. godinu evidentirala i troškove po računima iz 2010. godine.

(2) Ekološka stranka E-5 Zeleni nije u godišnjem finansijskom izvještaju iskazala štedni račun Parlamentarne grupe E5 u Općinskom vijeću Bosanska Krupa u Raiffeisen bank dd BiH, Filijala Bosanska Krupa, podatke o ostvarenom prometu u 2011. godini i stanju sredstava na dan 31.12.2011. godine, čime je prekršila odredbe člana 11. Pravilnika o godišnjim finansijskim izvještajima političkih stranaka.

Prema podacima sa analitičke kartice, promet ulaza na ovaj račun u 2011. godini iznosio je 6.000,00 KM, promet izlaza 6.000,00 KM, dok na dan 31.12.2012. godine stranka na ovom računu nije imala sredstva.

Uvidom u poslovne knjige, utvrđeno je da stranka nije evidentirala promet ostvaren putem ovog računa.

⁴ U skladu sa odredbom člana 11. stav (1) Zakona o finansiranju političkih stranaka, političke stranke su obavezne voditi potpune i tačne evidencije o svojim prihodima i rashodima.

- (3) Na osnovu dokumentacije o izdvajanjima sredstava iz budžeta Općine Bosanska Krupa, utvrđeno je da je Ekološka stranka E5-Zeleni iz budžeta ove općine u 2011. godini primila sredstva u iznosu od 6.000,00 KM. Sredstva su uplaćena na štedni račun Parlamentarne grupe u Općinskom vijeću E5 u Raiffeisen bank dd BiH, Filijala Bosanska Krupa, a na osnovu Obavještenja Predsjednika Parlamentarne grupe E5.

Uvidom u poslovne knjige stranke i godišnji finansijski izvještaj, utvrđeno je da Ekološka stranka E5-Zeleni nije evidentirala prihode iz budžeta ove općine u iznosu od 6.000,00 KM, odnosno nije u obrascima 3 i 3-f iskazala prihode, čime je prekršila odredbe člana 11. stav (1) i stav (3) Zakona o finansiranju političkih stranaka i člana 13. i 19. Pravilnika o godišnjim finansijskim izvještajima političkih stranaka.

- (4) Ekološka stranka E-5 Zeleni u svojim poslovnim knjigama nije evidentirala troškove OO Bosanska Krupa u iznosu od 6.000,00 KM, odnosno da ne raspolaže dokumentacijom iz koje je moguće utvrditi u koju svrhu su navedena sredstva utrošena. Obzirom da stranka u godišnjem finansijskom izvještaju nije iskazala ove troškove, prekršene su odredbe člana 20. i 21. Pravilnika o godišnjim finansijskim izvještajima političkih stranaka.

- (5) Na osnovu dokumentacije (izvod otvorenih stavki na dan 31.12.2011. godine), utvrđeno je da obaveze E5 prema Službi za zajedničke poslove organa i tijela Federacije Bosne i Hercegovine po osnovu utroška vode, električne energije i grijanja iznose 3.095,63 KM.

Stranka je u obrascu 5 iskazala obaveze prema ovom dobavljaču (izuzev obaveze po osnovu zakupnine) u ukupnom iznosu od 3.144,01 KM, odnosno nije tačno iskazala obaveze, čime je prekršila odredbe člana 23. Pravilnika o godišnjim finansijskim izvještajima političkih stranaka.

Takođe je utvrđeno da je stranka kao obaveze prema Službi za zajedničke poslove iskazala i obaveze po osnovu odvoza smeća prema KJKP „Rad“ Sarajevo u iznosu od 192,44 KM.

- (6) Pregledom finansijskih izvještaja Ekološke stranke E5-Zeleni u periodu od 2005. do 2008. godine, utvrđeno je da stranka u svojim poslovnim knjigama i u finansijskim izvještajima nije pravilno iskazivala obaveze prema dobavljačima i prema povjeriocima po osnovu pozajmicama, odnosno da postoje indicije da stranka svoje obaveze prikazuje nerealno.

Pregledom godišnjih finansijskih izvještaja za 2009. i 2010. godinu, Služba za reviziju je utvrdila da stranka nije pravilno iskazala obaveze po pozajmicama prema fizičkim licima jer je rok za povrat pozajmica istekao 2003., odnosno 2007. godine.

Obzirom na starosnu strukturu obaveza, kao i na činjenicu da je E5 u godišnjem finansijskom izvještaju za 2011. godinu, takođe, iskazala obaveze po osnovu pozajmica prema fizičkim licima⁵, sasvim je izvjesno da je stranka nerealno iskazala obaveze prema povjeriocima.

Samim time što iz svojih evidencija nije isknjižila obaveze za koje ne postoji realni osnov za njihovo plaćanje, stranka je izbjegla da iskaže dio svojih prihoda.

⁵ Stranka je u obrascu 5 iskazala obaveze prema fizičkim licima u iznosu od 29.500,00 KM.

5.2. PREPORUKE

Preporučuje se Ekološkoj stranci E5-Zeleni da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da ne prima priloge koji su zabranjeni odredbama člana 8. stav (1) Zakona,*
- *da, u skladu sa odredbama člana 11. stav (1) Zakona, uspostavi potpune evidencije o prihodima i rashodima, odnosno uspostavi knjigovodstvene evidencije u skladu sa propisima o računovodstvu i računovodstvenom praksom,*
- *da postupa u skladu sa odredbama člana 11. stav (3) Zakona, odnosno da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka, i*
- *da izvrši usaglašavanje svojih obaveza sa povjeriocima, kako davaocima pozajmica, tako i sa dobavljačima, te sačini odgovarajuće knjigovodstvene isprave na osnovu kojih će iz poslovnih knjiga izvršiti isknjižavanje nepostojećih obaveza.*

KOMENTAR:

U ostavljenom roku, Ekološka stranka E5-Zeleni nije dostavila primjedbe na Preliminarni izvještaj o pregledu godišnjeg finansijskog izvjaštaja za 2011. godinu.

Mr. Hasida Gušić, šef Službe za reviziju

Sanja Čabrilo, revizor